

14.11.2017

Máttááttásminister já säminuorah: Sämikielâi siäiluttem já iäláskitem lii mii ohtsâš äšši

Sämikielâi já -kulttuur tááláá tiileest savâstállui onne Helsigist, ko máttááttásminister Sanni Grahn-Laasonen teivâdij säminuorâiguin. Nuorah muštâlii máttááttásministerân jieijâs feerimijn eereeb iärásij sämikielâ oppâmist, kielâ merhâšumeest jieijâs identiteetân, kielâ moonâtmist já ton maasâd vâldimist sehe sämikielâi sajattuvâst já tááláá tiileest.

Säminuorâin lii noonâ táttu ovdediđ sämikielâ já -kulttuur sajattuv já eellimvuáimálâšvuodâ. Mij tuáivup, ete staatâ västid taan táárbun, vâi puátteevuodâst tarvaniččijm hástusáid tááláást vuáimálubboht oovtâst, säminuorah pahudeh savâstállâm loopân.

Máttááttásminister já nuorah savâstállii eereeb iärásij sämikielâi máttááttásân lohtâseijee koččâmušâin sämikuávlust já ton ulguubeln. Ulmen lâi lasettiđ ibárdâs sämikielâi já -kulttuur uhkevuálásii sajattuvâst sehe savâstállâđ sämikielâi siäilutmist já iäláskitmist. Ulmen lâi meid vuáđustiđ sâmmilij já Suomâ staatâ koskâsii sovâdâttâmproosees valmâštállâm säminuorâi uáinust.

- Jieijâs kielâ ja kulttuur kattim lii eromâš tergâd, vâi kulttuurârbi sehe kielâ sirdâšuveh ovdâskulij. Eenikielâ lii tot niávvu, moin juáhâš mist vuosâsaajeest liäkkâ jieijâs: jurduidis já tobdoidis. Lii pyeri huámmâšiđ, maht nuorâ suhâpuolvâ ana áárvust já haalijd siäiluttiđ já turviđ jieijâs kielâ já kulttuurârbi jotkum. Mij kolgâp oovtâst uuccâđ ain uđđâ čuávdusijd sämikielâ máttááttâs oovdedmân, máttááttásminister **Sanni Grahn-Laasonen** iätá.

Riehtiministeriö já Sämitige Nuorâiräädäi oovtâstpargoost ornim savâstâlmân uásálistii máttááttásminister, Sämitige Nuorâiräädäi já Suomâ Säminuorâi rs ovdâsteijei lasseen eereeb iärásij Sämitige saavâjođetteijee Tiina Sanila-Aikio já staatâčällee Paula Lehtomäki staatâräädäi kansliast. Savâstállâm čuovvuu meid ovdâskode vuáđulahâváljukode já čuovviittâsváljukode, Pärniäššiváldálii já Olmoošvuogâdvuotâlitto rs ovdâsteijeeh.

Sâmmiliih láá Euroop union kuávlv uáinoo algâaalmug. Suomâst, Taažâst, Ruotâst já Ruošâst sâmmiliih láá suulân 100 000, main Suomâst ääsih suulân 10 500. Sist áárvu miel peeli sárnuh eenikiellân monnii kuulmâ Suomâst sarnum sämikielâst; anarâškielâ, nuorttâlâškielâ já orjâlâškielâ. Suomâ sâmmilijn paijeel peeli já vuálá 10-ihásijn sâmpárnáin paijeel 70 prosentid ääsih tääl sämikuávlv ulguubeln. Sämikuávlv ulguubeln ässee suulân 2000 sâmpárnáást já -nuorâst suulân 50 láá sämikielâlii arâšoddâdmist já suulân 100 sämikielâ máttááttâsâst.

Tilálášvuotâ lâi uási riehtiministeriö koordinistem *Suomâ 100 – Syemmilii demokratia puátteevuotâsavâstâlmeh* -haavâ, mon váldu-ulmen lii uáassin Suomâ 100 -juhleive ohjelm pyehtid oovdân vuárusavâstállâm tuáimee demokratia vuáđuiähtun sehe kavnáđ uđđâ vuovijd ovdedeijee ohtsâškodálii savâstâlmân. Riehtiministeriö hahâkyeimih láá Sitra, staatârääđi kanslia Suomâ 100 - čäällimkodde já staatâvarijministeriö.

Lasetiäđuh:

hovdá Johanna Suurpää, riehtiministeriö, puh. 0295 150534, ovdânommâ.suhânommâ@om.fi (sämmilij vuoigâdvođah)

máttááttâsneuvos Anne Onnela, máttááttâs- já kulttuurministeriö, puh. 0295 330010, ovdânommâ.suhânommâ@minedu.fi (sämikielâi máttááttâs já iäláskitem)

saavâjođetteijee Laura Pieski, Sämitige Nuorâirääđi, puh. 040 6837900, ovdânommâ.suhânommâ@windowslive.com

proojeekthovdá Liisa Männistö, riehtiministeriö, puh. 0295 150231, ovdânommâ.suhânommâ@om.fi (Suomâ 100 -haahâ)

Luvvá lase:

Sämiääših riehtiministeriö viermisiiđoin (<http://oikeusministerio.fi/saamelaisasiat>)

Sämitige viermisiiđoh (www.samediggi.fi)

Sämitige Nuorâirääđi viermisiiđoh (<http://www.samediggi.fi/nuorat/>)

Suomâ 100 – Syemmilii demokratia puátteevuotâsavâstâlmeh -haahâ (<http://oikeusministerio.fi/demokratian-tulevaisuuskeskustelut>)

Staatârääđi tiäđättâs 19.10.2017 sovâdâttâmkomissio valmâštállâm jotonpiejâmist (http://valtioneuvosto.fi/artikkeli/-/asset_publisher/10616/hallitus-kaynnistaa-saamelaisten-sovintokomission-valmistelu)